



## Wanita, agen kritikal

# membina dunia yang lebih adil

**TAKHTA SUCI: “Kepimpinan wanita untuk masa depan yang lebih cerah” demikian tema bagi perhimpunan antarabangsa para perwakilan Gereja dan wakil-wakil negara yang berlangsung di Roma baru-baru ini. Perhimpunan wanita itu bermatlamat mempromosikan kepentingan kepimpinan wanita dalam semua bidang, memartabatkan keperluan dan sumbangan penting mereka untuk dunia yang lebih sejahtera di tengah-tengah pelbagai cabaran global hari ini.**

Bagi merayakan Hari Wanita Antarabangsa 2024, yayasan amal Gereja, *Caritas Internationalis*, telah bergabung dengan Kedutaan Australia dan United Kingdom serta membawa penceramah dan pakar berprofil tinggi ke perhimpunan sehari di Kuria Yesuit, Roma pada Mac 6.

Perbincangan panel memberi tumpuan kepada pemerksaan wanita dalam Gereja Katolik dan bagaimana institusi agama serta kerajaan dapat meningkatkan kerjasama.

Pakar juga menjelaskan kisah-kisah kejayaan tentang bagaimana pendidikan, pemerksaan ekonomi dan pembangunan kemahiran telah membantu menjana kejayaan wanita sekaligus menyumbang dalam pelbagai bidang dan situasi global.

Antara mereka yang menyampaikan sesi ialah Sr Patricia Murray, Setiausaha Eksekutif Kesatuan Pemimpin Umum Religius Antarabangsa; Fr Arturo Sosa Abascal, Pemimpin Umum Yesuit, ahli-ahli teologi wanita, termasuk Profesor Maeve Heaney dari Universiti Katolik Australia; dan Dr Nontando Hadebe dari Kolej St Augustine Afrika Selatan.

Christopher Trott, Duta Besar British ke Takhta Suci, menegaskan bahawa “wanita adalah agen kritikal atau penting untuk membina masa depan yang lebih baik dan bijak bertindak balas terhadap isu-isu global yang mendesak dan membina dunia lebih adil, lebih bebas, lebih selamat, lebih kaya ... dunia yang lebih hijau di mana semua orang mendapat manfaat dan tiada siapa yang ketinggalan. Oleh itu, peranan wanita harus diberi sokongan dan pengiktirafan.”

“Menyerlahkan suara wanita dari pelbagai bangsa dan agama dan menghargai kepimpinan wanita dalam Gereja dan masyarakat,” merupakan antara lain matlamat perhimpunan tersebut.

Alistair Dutton, Setiausaha Agung *Caritas Internationalis*, menyatakan bagaimana kemiskinan, keganasan dan kekurangan akses kepada pendidikan dan perkhidmatan asas merupakan faktor yang mesti ditangani kerana ia mengurangkan sumbangan serta penglibatan wanita.

Itulah sebabnya Caritas bekerjasama hingga ke akar umbi di lebih 200 negara bagi menggalakkan pemerksaan, pendidikan dan mempromosi penyertaan wanita dalam kepimpinan serta membuat keputusan di semua peringkat dan menunjukkan

bagaimana pengalaman dan kepakaran wanita dalam membina masa depan yang lebih cerah.

Duta Besar Australia ke Takhta Suci, Chiara Porro, juga menekankan bagaimana “wanita adalah teras kepada perubahan transformatif” yang diperlukan hari ini.

Beliau berkata kita perlu memanfaatkan pengetahuan, kesabaran dan pengalaman para wanita khususnya di peringkat kepimpinan.

Chiara mengatakan mengenal pasti dan mengatasi halangan adalah penting seraya mengongsikan bahawa di negara asalnya, kerajaan komited membina dunia di mana semua orang boleh mencapai dan menyumbang potensi mereka, tanpa mengira jantina mereka, demi masa depan global yang lebih baik.

Sehari sebelum pertemuan besar itu, Sri Paus Fransiskus telah menghantar pesan pada Mac 7 yang menyatakan bahawa beliau berbesar hati di atas inisiatif Setiausaha Agung *Caritas Internationalis*, Duta Besar United Kingdom serta Australia yang bergabung menganjurkan hari penting itu.

Walaupun Bapa Suci tidak dapat mengambil bahagian dalam acara itu, prelatus itu meyakinkan semua peserta bahawa dia berdoa bagi “hasil baik dari pertemuan antarabangsa itu dan meminta Tuhan mengurniakan kebijaksanaan ke atas semua peserta.”

Sri Paus Fransiskus juga berdoa agar “Gereja dan di seluruh dunia, untuk menggalakkan penghormatan terhadap martabat yang sama dan saling melengkapi antara wanita dan lelaki.” — *media Vatikan*

# Menua seperti “sannyasin” miskin yang kudus

Apakah itu biara? Bagaimanakah biara berfungsi? Sto Benediktus (480-547 SM), yang dianggap sebagai pengasas monastikisme Barat, menawarkan nasihat ini sebagai peraturan penting untuk para biarawan: Tinggal di sel anda dan ia akan mengajar semua yang anda perlu tahu.

Kita harus memahami nasihat itu dengan betul. Ia sebenarnya adalah metafora, bukan nasihat yang boleh diterjemahkan begitu sahaja.

Apabila Sto Benediktus memberitahu seorang biarawan untuk tinggal di dalam selnya dan membiar suasana biara mengajar apa yang perlu diketahuinya, dia tidak merujuk kepada sel atau bilik di biara itu.

Sto Benediktus merujuk kepada keadaan kehidupan di mana seorang biarawan dapat menemui dan mengenali dirinya sendiri dengan lebih baik.

Perkara ini kerap dinyatakan dalam kerohanian Kristian sebagai kesetiaan kepada tugas negara.

Idea di sini ialah jika anda setia dalam cinta dan dalam hati, anda sentiasa positif terhadap situasi dalam kehidupan khususnya peristiwa di dalam hidup yang memantang atau menjadikan anda lebih berbelas kasihan.

Sebagai contoh, seorang ibu yang merendahkan hatinya, mengubah sikap dari mementingkan diri menjadi lebih murah hati dan setia dalam membesarkan anak-anaknya, pasti akan mengalami kematangan dan altruisme melalui proses itu.

Secara metafora, rumah ibu itu

ialah sel biara dan dia akan menjadi Pemimpin Biara atau Abbess (dengan beberapa biarawan yang sangat muda) yang tinggal di dalam biara atau rumah itu.

Dia akan mengajarnya semua yang dia tahu. Dia akan membesarkan anak-anak, tetapi pada masa yang sama, pengalaman itu memantangkannya.

Sifat keibuan akan mengajarnya apa yang dia perlu tahu dan akan mengubahnya menjadi seorang penatua yang bijak, seorang yang penuh hikmat dan berkat.

Proses penuaan adalah perkara biasa dalam biara. Jika kita hidup cukup lama, kita akan menyedari proses penuaan menjadikan semua orang sebagai biarawan.

Para biarawan mengambil empat kaul: kemiskinan, kesucian, keetaatan dan ketekunan.

Proses penuaan menggerakkan kita (seolah-olah tanpa belas kasihan) ke arah peminggiran, tidak bergantung kepada orang lain, jauh dari kehidupan seks yang aktif dan ke dalam situasi hidup yang tidak dapat dielakkan. Dalam kata lain, proses penuaan mengenakan empat kaul dalam diri kita.

Tetapi, seperti nasihat Sto Benediktus, ini boleh mengajar kita semua yang perlu kita ketahui, dan mempunyai kuasa unik untuk memantangkan kita dengan cara yang sangat mendalam.

Biarawan mempunyai rahsia yang patut kita ketahui. Mereka juga tahu rahsia mengenai berkat-berkat dalam proses penuaan.

Ini boleh menjadi pengajaran terutamanya tentang bagaimana

kita boleh menjadikan hari-hari terakhir kita dan kematian kita sebagai hadiah yang radikal kepada orang lain.

Pada abad pertama Kekristianan, kemartiran dilihat sebagai cara ideal bagi seorang Kristian untuk mengakhiri hari-harinya di bumi.

Meniru Kristus dan memberikan kematian anda sebagai hadiah dilihat sebagai sangat radikal pada masa ini.

Lebih-lebih lagi, selepas agama Kristian menjadi agama rasmi kebanyakan negara dan maharaja tidak lagi membunuh orang Kristian.

Namun, kita masih boleh menjadi martir pada zaman moden ini. Satu cara yang agak popular kemartiran ialah contohnya selepas membesarkan anak-anak, mencapai persaraan, sepasang suami isteri akan meninggalkan satu sama lain.

Masing-masing akan pergi ke biara yang berasingan dan menjalani sisa hidup mereka sebagai biarawan atau seorang biarawati.

Ahli mistik Kristian klasik pernah menyatakan tentang bagaimana dalam fasa terakhir kehidupan, kita harus memasuki sesuatu yang mereka panggil “malam gelap roh” iaitu kita secara proaktif membuat keputusan radikal berdasarkan iman untuk bergerak ke dalam situasi dalam kehidupan di mana kita menyerahkan segala-galanya dengan iman bahawa Tuhan akan menyediakan segala-galanya untuk kita.

Ini selari dengan kerohanian Hindu yang menyatakan bahawa



Pada peringkat terakhir, tahap kehidupan yang matang sepenuhnya, kita harus menjadi seorang “sannyasin”, seorang pengemis tua yang suci.

pada peringkat terakhir, tahap kehidupan yang matang sepenuhnya, kita harus menjadi seorang *sannyasin*, seorang pengemis tua yang suci.

Saya yakin bahawa kebanyakan daripada kita tidak akan secara proaktif membuang semua “keselamatan” dan kesenangan kita. Atau secara sengaja meletakkan diri kita dalam situasi di mana kita tidak berdaya.

Alam semulajadi akan melangkah masuk dalam kehidupan kita. Tanpa susah payah, proses penuaan akan melakukan apa yang perlu untuk kita. Ia akan menjadikan kita *sannyasin* dan memasukkan kita ke dalam “kegelapan malam roh”.

Sungguh metafora yang tepat! Proses kehidupan dapat dibantu dengan “tinggal” dalam biara semula jadi.

Metafora ini juga sesuai untuk

apa yang dimaksudkan dengan (tanpa dijemput) memasuki malam roh yang gelap dan apa yang dimaksudkan sebagai menjadi pengemis tua yang suci, seorang *sannyasin*.

Secara ringkasnya ia bermaksud begini: Apabila seseorang berada dalam kehidupan yang senang ditambah pula mempunyai segala kemudahan, tidak kira sama ada dia seorang jutawan atau orang miskin, peraturan adalah sama untuk semua orang.

Suatu hari nanti, ketika anda tidak dapat lagi menjaga diri anda (akan berlaku kepada semua orang) anda menjalani kehidupan monastik keetaatan dan kebergantungan.

Secara metafora dalam proses menua: Anda hidup berpandukan dengan loceng biara mati sebagai pengemis tua yang kudus.—  
*Hakcipta Terpelihara 1999-2024*  
@ Fr Ron Rolheiser

## Telah tiba saatnya ...

Bab 12 dalam Injil Yohanes menggambarkan bahagian terakhir masa penampilan Yesus di depan umum, sebelum Dia mengharungi peristiwa-peristiwa penderitaan-Nya, yang akan kita ikuti selepas Hari Minggu Palma.

Seperti orang-orang Yunani, kita pun ingin bertemu, mengenal wajah Yesus yang sebenarnya. Di seluruh Kitab Suci terungkap, bahawa semua orang ingin mengenal dan melihat wajah Tuhan. Misalnya dalam Mazmur tercetuslah kerinduan manusia melihat Tuhan.

Kitab Ibrani (bacaan kedua) memperkenalkan kepada kita Yesus dengan perjuangan batin-Nya di kebun zaitun di Getsemani. “Dia telah mempersembahkan doa dan permohonan dengan ratap tangis dan keluhan kepada Dia, yang sanggup menyelamatkan-Nya dari maut” (Ibr 5:7).

Dalam Perjanjian Lama tidak pernah imam agung digambarkan sebagai orang yang menyamakan dirinya dengan orang lain se-

bagai sesama. Imam agung yang berbelas kasih kepada kaum pendosa tidak dikenal dalam Perjanjian Lama.

Ternyata dalam Kitab Ibrani memperkenalkan gambaran tentang imam yang total berbeza!

Imamat Yesus berarti kesediaan diri ikut merasa menderita (*compassio*) dan solidariti.

Yesus ikut mengalami hidup manusia dengan darah dan daging dengan segala ciri-cirinya kecuali dosa.

Dia telah diuji dengan segala percubaan seperti yang pernah kita alami sebagai manusia. Dia tahu kelemahan-kelemahan kita. Tetapi Dia selalu mempunyai “*compassio*”, peka ikut merasakan penderitaan orang lain disertai keprihatinan. Inilah imamat yang sebenarnya, dahulu mahupun sekarang!

Apa pesan gambaran atau wajah Yesus itu bagi kita sekarang ini?

Wajah Yesus yang kita kenal itu bukan menjauhkan diri kita daripada-Nya. Tetapi sebaliknya!

Pelbagai macam halangan, percubaan, kelemahan, kerapuhan kita sehari-hari menciptakan suatu kesempatan bagi kita untuk bertemu dan untuk melihat wajah Yesus.

Kesimpulan kita ialah, jangan sampai hidup kita tertekan, kerana harus memikul beban situasi hidup kita yang berat. Mengapa?

Kerana kita tahu dan yakin bahawa Yesus adalah bersama kita. Dan menurut Kitab Ibrani Yesus telah diselamatkan dari maut dan didengarkan permohonan-Nya “kerana kesalehan-Nya” dan kerana “telah belajar menjadi taat”.

Nah, bila demikian, kita pun dapat menerima hiburan. Sebab dengan doa kita yang tekun dan disertai keetaatan kita akan kehendak Tuhan, kita pasti akan didengarkan Tuhan.

Kita mengenal Yesus melalui Kitab Suci, khususnya melalui Injil. Injil adalah kesaksian para murid Yesus sebagai saksi-saksi, dan diabadikan dalam Injil sebagai pegangan bagi semua orang

## HARI MINGGU PRA-PASKAH V (TAHUN B)

YEREMIA 31:31-34

IBRANI 5:7-9

INJIL YOHANES 12:20-33

bila mahu mengenal Yesus.

Di samping kesaksian, kita juga memerlukan saksi-saksi hidup. Kita mempunyai seorang saksi untuk zaman kita iaitu Santo Sri Paus Yohanes Paulus II.

Orang yang bernama Karol Wojtyla yang kini kita kenali sebagai Sri Paus Santo Yohanes Paulus II yang bertempur dengan pelbagai pegelutan serta penderitaan yang harus dialaminya sebagai Pengganti Petrus.

Beliau wafat pada April 2, 2005. Sri Paus itu meninggalkan khazanah iman untuk kita bahawa setiap orang, termasuk Sri Paus, Wakil Kristus sendiri, harus menderita!

Bapa Suci itu pernah ditembak untuk dibunuh. Menjelang masa akhir kepausannya, kekuatan

tubuhnya menjadi lemah sehingga menghalang beliau untuk mengunjungi umat di pelbagai penjuru dunia; tangannya menjadi tidak mampu menulis ensiklik, seruan apostolik dan lainnya; begitu juga suara pewartaannya yang hampir tidak dapat didengar — namun semuanya tidak menggoncang imannya.

Oleh itu, banyak suara di dunia ini mengatakan bahawa pewartaan yang terkuat dari Sri Paus Sto Yohanes Paulus II ialah ketika prelatus itu diakui secara rasmi sebagai Santo Gereja, meskipun kekuatan, tulisan dan suaranya sudah tidada di dunia tetapi benih karya-Nya telah meninggalkan wajah Yesus untuk kita semua! — *Mgr. F.X. Hadisumarta O.Carm, imankatolik*

# Kem untuk Wanita Katolik Berhikmat

TATAL, KENINGAU: “Jangan pernah dilupakan, bahwa doa merupakan unsur pokok kehidupan Kristian” (*Familiaris Consortio*, 62).

Seramai 103 peserta dari tiga keuskupan/agung di Sabah menyertai Kem WABERKAT (Wanita Berhikmat Katolik) siri kedua di Keuskupan Keningau baru-baru ini di Rumah Retret Keuskupan Keningau, Tatal.

Kem yang berlangsung selama empat hari itu dikendalikan oleh tim pelaksana dan fasilitator yang adalah alumni WABERKAT dan dibantu oleh tim PRISKAT (Pria Sejati Katolik) serta tim CFM (*Catholic Family Ministry*).

Turut hadir dalam pelayanan kem ini ialah tim WABERKAT dan CFM dari Keuskupan Surabaya dan Keuskupan Semarang, Indonesia. Semasa memimpin Misa Kudus penutup kem WABERKAT, Uskup Cornelius Piong memetik tiga aspek utama dari seruan apostolik Sri Paus Santo Yohanes Paulus ke-II, *Familiaris Consortio*.

Pertama, berkenaan doa yang merupakan aspek penting dalam membangun relasi kita dengan Tuhan. Uskup Cornelius berharap keluarga dapat mendidik anak-anak dengan doa



Kem WABERKAT menekankan kerukunan hidup tidak dapat dicapai tanpa pengampunan.

peribadi dan doa liturgi.

Kedua, selalu bersyukur dan ingat akan kehadiran Tuhan dalam hidup lebih-lebih lagi pada masa sekarang yang selalu dicabar dengan arus kemodenan dan budaya mati.

Ketiga, menjadi tanda kesetiaan yang tak pernah ingkar, cinta kasih Tuhan dan Yesus Kristus terhadap semua dan setiap manusia.

peranan kita terhadap komuniti bermula dalam keluarga (*Persekutuan yang tidak dapat dibatalkan, Familia Consortio*, 20).

Pada akhir homilinya, Bapa Uskup mengingatkan para wanita agar sentiasa merayakan Ekaristi Suci dan Sakramen-sakramen lainnya, menghidupkan budaya berdoa dan menyangi alam ciptaan Tuhan.

Sdri Hilda George selaku PIC dan juga Ke-tua Panitia WABERKAT Keuskupan Keningau, dalam ucapannya berpesan bahawa Kem Waberkat siri ketiga mungkin akan diadakan pada bulan Oktober atau Novembertahun ini. Kem Wanita Berhikmat Katolik yang pertama telah diadakan pada Jun 1-4, 2023 yang disertai 120 peserta. — *Melty Paulus*

## Makan malam keharmonian bersama pemimpin pelbagai agama

KUALA LUMPUR: Dalam mengukuhkan perpaduan dan kemajmukan, lebih 100 penganut pelbagai agama berkumpul di Kelab Raintree, untuk majlis makan malam.

Dianjurkan oleh bahagian antara agama Titiwangsa di bawah naungan YB Datuk Seri Johari Abdul Ghani, Ahli Parlimen Titiwangsa dan Menteri Perusahaan Perladangan dan Komoditi Persekutuan, majlis makan malam itu mendapat sambutan yang amat menggalakkan.

Dr Florence John, penyelar Pelayanan Kementerian Hal Ehwal Ekuimenikal dan Antara Agama (PMEIA) Gereja peringkat paroki Hati Kudus Yesus (SHC) dan pengerusi bahagian antara agama Titiwangsa, menekankan bahawa majlis makan malam itu meraikan perpaduan dan toleransi di kalangan pelbagai penganut agama serta kepercayaan.



Pemimpin dan perwakilan pelbagai agama memeriahkan majlis makan malam antara agama.

Acara itu diserikan dengan sesi ucapan daripada pelbagai pemimpin agama dan wakil, semuanya menekankan peranan penting majlis makan malam itu dalam memupuk perpaduan dalam kalangan penganut antara iman.

Mereka yang berucap termasuklah Ven Datuk K. Sri Dhammaratana, sami besar Buddha Malaysia; K T Lee dari Majlis Antara Agama Bahai; Tuan Haji Nicholas Sylvester Abdullah, pengerusi *Myguide*

Malaysia dan Yayasan Pusat Hidayah; Mitchy Letchumy, Setiausaha Hindu Kuil Sri Ganesar di Kg Pandan; Maria Vetha, seorang katekis dari SHC; Jasvinder Singh, perwakilan dari Kuil Gurdwara Sahib di Kg Pandan; Rev Matthew K Ponnose dari Gereja Mar Thoma Syria dan Setiausaha Agung Persatuan Bible Malaysia; dan Tan Seri Lee Lam Thye, seorang penyokong terkemuka untuk perpaduan negara.

*St John's Institution Naval Cadet Band Boys*, turut mempersembahkan persembahan muzik pada majlis itu.

Hadirin juga menyaksikan Datuk Seri Johari diberi penghormatan dengan kalungan bunga dan selendang oleh pengerusi Majlis Pastoral Paroki SHC, Clement Ambrose sebagai pengiktirafan sumbangan beliau dalam acara itu dan masyarakat.

### Tanya Jawab



Adakah anda mempunyai persoalan agama, Kitab Suci atau ajaran Gereja? Hantarkan soalan anda ke:

**HERALD**  
5, Jalan Robertson,  
50150 Kuala Lumpur  
Tel: 03-2026 8291  
Email:  
liza@herald.com.my

## Protestan masuk Katolik

**Soalan:** Pada tahun lalu di paroki saya, telah diadakan upacara penerimaan secara rasmi beberapa orang dari Gereja Protestan (sudah dewasa). Mengapa mereka hanya diterima, tanpa melalui upacara pembaptisan dan langsung menerima komuni. — *Yang Ragu*

**Jawaban:** Baptis, Komuni dan Krisma merupakan sakramen-sakramen inisiasi maka dengan menerimanya, seseorang masuk menjadi anggota Gereja.

Dalam hal ini, Sakramen Baptis adalah pintu menuju sakramen-sakramen lainnya. Melaluinya, kita disatukan dengan kematian dan kebangkitan Yesus sendiri sehingga, kita disatu-ragakan menjadi anggota Tubuh-Nya. Serentak pula, mereka yang masuk dalam persekutuan Gereja Katolik, yang akan dilanjutkan secara penuh melalui dua sakramen inisiasi lainnya, iaitu Komuni dan Krisma.

Dalam dokumen Konsili Vatikan II tentang ekuimenikal, *Unitatis Redintegratio* (UR), Gereja mengakui baptisan sah, yang menerima saudara-saudari kita dalam Gereja atau jemaat gerejani mereka.

Dengan baptisan itu, mereka menjadi anggota Tubuh Mistik Kristus dan masuk juga dalam persekutuan Gereja Katolik yang satu, kudus, Katolik dan apostolik, sekalipun persekutuan itu belum sempurna.

“Orang-orang yang percaya kepada Kristus

dan telah dibaptis dengan sah berada dalam persekutuan dengan Gereja Katolik, meskipun persekutuan ini tidak sempurna.

Perbezaan yang ada dalam tingkat yang berbeza-beza antara mereka dan Gereja Katolik – baik dalam doktrin dan dalam disiplin, atau mengenai struktur Gereja – memang menciptakan banyak hambatan, kadang-kadang serius, untuk persekutuan gerejawi yang penuh. ...

Tetapi meskipun demikian, tetaplah benar bahawa semua orang yang dibenarkan kerana iman dalam baptisan adalah anggota tubuh Kristus dan memiliki hak untuk disebut Kristian dan tepat pula oleh putera-puteri Gereja Katolik diakui sebagai saudara-saudari dalam Tuhan” (UR 3).

Berkat pembaptisan, mereka sudah menjadi anggota tubuh Kristus dan sungguh saudara-saudari dalam Tuhan. Pembaptisan memeteraikan kita secara kekal menjadi anak Tuhan dan anggota keluarga Tuhan

Oleh kerana meterai ini bersifat kekal, maka baptisan yang sah hanya diperoleh satu kali saja dan tidak boleh diulangi. Oleh itu, bila mereka masuk dalam persekutuan Gereja Katolik secara penuh, mereka tidak perlu dibaptis lagi.

Apakah yang membuat baptisan disebut sah (*valid*)? Menurut Gereja Katolik baptisan sah terjadi kalau dibuat dengan air (inilah disebut aspek materinya) dalam nama Tritung-

gal (aspek forma/sabda): “Aku membaptis .... (nama)... dalam nama Bapa, dan Putera dan Roh Kudus”.

Setiap Konferensi para Uskup dapat menentukan Gereja-gereja mana yang baptisannya diakui sah oleh Gereja Katolik.

Saudara-saudari kita yang mahu memasuki Gereja Katolik tetap perlu dipersiapkan secara doktrin mahupun spiritual.

Meskipun bukan disebut masa katekumenat yang diperuntukkan bagi calon baptis, persiapan ini perlu untuk mengenal ajaran, tradisi dan organisasi Gereja Katolik agar mereka dapat bersedia bagi persekutuan penuh itu yang dimaterai dengan menerima sakramen-sakramen inisiasi.

Bagi mereka yang berasal dari Gereja Protestan dan ingin masuk Katolik, amat dianjurkan mereka melakukan Sakramen Tobat terutama kalau penerimaan dibuat dalam Misa.

Sesudah menyatakan iman mereka, mereka ini akan diterima dan sesudah Ekaristi mereka langsung menerima Komuni Pertama. Bila uskup memberi wewenang, paderi juga dapat memberikan mereka Sakramen Krisma.

Upacara penerimaan saudara-saudari kita yang sudah dibaptis dalam Gereja bukan Katolik ini diatur dalam *Ordo Initiationis Christianae Adultorum* (Sri Paus Paulus VI tahun 1972). — *Fr Gregorius Hertanto MSC, hidupkatolik.com*

# Sahabat kecil Yesus

Berdoa rosari misteri Sedih amat sesuai didaraskan pada musim Pra-Paskah. Susun dan tulis nombor mengikut pesusunan peristiwa dalam misteri Sedih pada gambar di bawah.

= dihormati

= mengikut

= di mana

= berada




Yesus didera (Yoh19:1).

Yesus dimahkotai dari (Yoh19:2-3).

Yesus berdoa kepada Bapa-Nya di syurga dalam sakratul maut (Luk 22:39-46).

Yesus wafat di salib (Luk 23:44-49).

Yesus memanggul salib-Nya (ke Gunung Kalvari) (Luk 23:26-32).




= melayani

pelayan-Ku

**SESIAPA MELAYANI AKU, IA HARUS \_\_\_\_\_**  
**AKU DAN \_\_\_\_\_ AKU BERADA, DI SITUPUN**  
**\_\_\_\_\_ AKAN \_\_\_\_\_ . SESIAPA**  
**\_\_\_\_\_ AKU, DIA AKAN \_\_\_\_\_ BAPA.**  
**(YOH 12:26)**

**Bongkar KOD RAHSIA pada gambar di atas untuk membaca pesan penuh Yesus.**

**LENKAPKAN WAJAH KANAK-KANAK PADA GAMBAR DI BAWAH KEMUDIAN WARNAKAN.**



Mac 19 - Sto Yosef, Suami bonda Maria



**Doa kepada Sto Yosef**

Santo Yosef yang baik, Suami Maria, lindungilah kami; jadilah pembela bagi Gereja dan Takhta Suci dan lindungilah ibu bapaku, sahabat-sahabatku dan semua orang yang telah berbuat baik dalam hidupku.

Hello adik-adik,

Apa khabar? Pada minggu ini, kita memasuki minggu kelima Pra-Paskah.

Ini merupakan minggu terakhir Pra-Paskah sebelum kita merayakan Hari Minggu Palma pada minggu hadapan, kemudian memasuki minggu suci.

Adik-adik, pada hari Minggu ini, adik-adik akan mendengar Yesus yang menyeru kepada umat agar setia mengikut Dia dan Dia juga memberi gambaran bahawa hari kesengsaraan-Nya sudah hampir tiba.

Adik-adik, mari kita selalu belajar dan meneladani sikap Yesus. Berdoa adalah latihan rohani kita untuk menjadi Katolik yang sesuai dengan kehendak Bapa!

Dengan berdoa juga, kita akan selalu dilindungi dan dibimbing oleh Roh Kudus lebih-lebih lagi ketika kita mewartakan Khabar Gembira kepada sesama.

Salam sayang  
Antie Melly

# BELIA MILENIUM

## Vatikan lancar kempen media sosial temui semula *Christus vivit*

ROMA: Pada tahun 2024, Gereja menyambut ulang tahun kelima penerbitan Seruan Apostolik Pasca Sinodal *Christus Vivit*.

Lima tahun lalu iaitu pada Mac 25, 2019, di Rumah Suci di Loretto, Sri Paus Fransiskus telah menandatangani "surat" kepada orang muda susulan Sinode Uskup tentang Kaum Muda yang diadakan di Vatikan pada tahun sebelumnya.

Salah satu pembaharuan Sinode Oktober 2018 ialah perhimpunan pra-Sinodal yang melibatkan golongan muda dari seluruh dunia.

Kini, sempena ulang tahun kelima *Christus Vivit*, Dikasteri untuk Rasul Awam, Keluarga dan Hidup menyatakan sokongannya kepada sekumpulan komunikator muda yang mengambil bahagian dalam program "*Faith Communication in the Digital World*" *Dicastery for Communication*.

Para komunikator muda itu mengadakan kempen melalui reka bentuk dan promosi melalui media sosial iaitu menggunakan platform rasmi Facebook dan Instagram Hari Belia

Sedunia (WYD).

Kempen yang berlangsung dari Februari 25 hingga April 25 bertujuan menghimpunkan golongan muda dari seluruh dunia.

Selama 12 minggu, mereka berkongsi makna dan semangat *Christus Vivit*, serta pengalaman WYD yang lalu.

Mereka mempromosi serta memberi inspirasi berdasarkan kata "hidup" dari *Christus Vivit* serta mengekalkan pengalaman Hari Belia Sedunia yang lalu dalam ruang digital.

Dengan pembikinan video-video digital yang memberi inspirasi serta petikan-petikan bijaksana dari *Christus Vivit* dan pesan-pesan hangat daripada peserta WYD — para peserta projek "Komunikasi Iman dalam Dunia Digital" berharap dapat berkongsi Kristus yang Hidup kepada para belia sekaligus mengekalkan pengalaman Hari Belia Sedunia dalam ruang digital dan menggemakan seruan Bapa Suci "Kamu sekarang adalah milik Tuhan, dan Dia mahu kamu berbuah" (CV, 178). — **media Vatikan**



Para komunikator belia berhimpun selama 12 minggu di Vatikan bagi mempromosi *Christus Vivit* dan menerbitkan video-video pengalaman menarik WYD 2023.

## Menjadi Maria zaman now!



Gambar kenangan Khemah Belia Keuskupan Keuskupan 2023 di paroki Membakut, Sabah.

**KENINGAU:** Melalui tema SYD-6 yang diambil dari Lukas 1:39, "Maria bangkit dan bergegas pergi" belia diharapkan menjadi Maria zaman now di mana mereka berani bangkit, bersiap dan bergegas pergi untuk mewartakan Injil.

Dalam satu rancangan Bual Bicara, tiga 'orang kuat' Sabah Youth Day ke-6 (SYD-6) membicarakan mengenai acara besar peringkat negeri Sabah itu secara langsung melalui platform Facebook SYD-6, baru-baru ini.

Ko-ordinator SYD-6, Sdra Roney Alfred Eming dan timbalannya iaitu Sr Terecia Loukang FSIC dan Sr Noemi Mejia FSIC membicarakan tentang sejarah ringkas SYD, perkembangan terkini SYD-6, harapan terhadap belia selepas SYD-6 dan sebagainya.

Para tetamu jemputan ini sebulat suara bersetuju SYD amat relevan untuk dijalankan kerana ia menghimpunkan belia dari tiga keuskupan/agung di Sabah, selaras dengan seruan Sri Paus Fransiskus tentang sinodal dan memantapkan iman kaum muda.

Sr. Terecia menceritakan mengenai SYD yang terilham oleh para belia yang menghadiri World Youth Day pada tahun 1995.

Pada tahun 2000, selepas perbincangan antara dua diosis, timbul gerakan untuk menganjurkan SYD yang pertama yang berlangsung di Katedral St Francis Xavier, Keningau pada tahun 2004.

Sdra Roney berkongsi tentang tahap persiapan tuan rumah untuk SYD tahun ini di mana promosi pendaftaran sedang giat dijalankan di seluruh paroki di dalam dan luar Sabah.

Katanya pihak penganjur sedang aktif menyediakan logistik dan penginapan bagi peserta yang dijangkakan akan mencapai seramai tiga ribu orang.

Topik mengenai pembayaran yuran SYD juga dibincangkan para penganjur mencadangkan pelbagai cara dilakukan bagi membantu para belia untuk mengurangkan bebanan yuran seperti menabung serta mengumpulkan dana melalui jualan dan sebagainya.

Pihak penganjur juga mengharapkan belia yang menyertai program ini diharapkan dapat mengalami kasih Yesus dalam program SYD.

Akhir sekali, pihak penganjur juga memberi pesanan kepada belia agar melalui SYD-6 dapat membentuk keperibadian mereka dan mengingatkan kepada belia bahawa masa muda hanya sekali — inilah masanya untuk melakukan hal-hal yang bermakna!

# Gencatan senjata adalah kewajiban moral

VATIKAN: Sri Paus Fransiskus mengulangi seruannya untuk segera melakukan gencatan senjata di Gaza seraya mengingatkan komuniti antarabangsa bahawa mereka memiliki “kewajiban moral” bagi mendesak pelucutan senjata di seluruh dunia.

Setelah Doa Angelus di Dataran Sto Petrus pada Mac 3, Sri Paus mendorong “rundingan lanjut untuk gencatan senjata segera di Gaza sehingga para tahanan yang diculik, dapat segera dibebaskan dan kembali ke pangkuan orang-

orang yang mereka cintai juga agar warga sivil dapat memiliki akses bantuan kemanusiaan yang sangat diperlukan.”

“Setiap hari saya membawa dalam hati saya, dengan kesedihan, penderitaan penduduk di Palestin dan Israel, kerana permusuhan yang sedang berlangsung. Ribuan orang terkorban, cedera, terlantar ... kehancuran serta penderitaan besar yang diakibatkan oleh perang “mempunyai kesan mendalam yang buruk bagi kumpulan kecil serta mereka yang

tidak berdaya, di mana masa depan mereka terancam.”

“Apakah kita benar-benar berfikir bahawa kita dapat membangun dunia yang lebih baik dengan cara ini? Apakah kita benar-benar berfikir bahawa kita dapat mencapai perdamaian?”


Sri Paus berulang kali menyeru kekerasan diakhiri di Tanah Suci sejak Oktober 7, 2023 ketika Hamas menyerang Israel dan Israel membalas dengan menyerang Gaza.

Prelatus itu juga meminta

masyarakat pada Mac 3 lalu agar tidak melupakan konflik di Ukraine, “di mana begitu ramai orang meninggal setiap hari.”

“Berapa banyak sumber daya yang terbuang untuk belanja ketenteraan, yang sayangnya terus meningkat kerana sikap degil beberapa pihak,” katanya.

“Saya sangat berharap komuniti antarabangsa memahami bahawa pelucutan senjata adalah tugas yang pertama dan terutama: pelucutan senjata adalah tugas moral.”



“Ia juga memerlukan keberanian seluruh anggota keluarga besar negara-negara untuk beralih dari keseimbangan rasa takut ke keseimbangan kepercayaan.” — *media Vatikan*

## Perbualan rohani jalan kepada sinodaliti

ROMA: Sidang pertama sinode tentang Sinodaliti menunjukkan cara efektif untuk memutus rantai klerikalisme dan menekankan suara serta peranan wanita dalam Gereja bermula dengan mendengar dan berdoa bersama sebelum membincangkan pelbagai isu, kata dua peserta sinode.

Klerikalisme terjadi apabila “kita tidak lagi mendengar satu sama lain; para klerus tidak mendengar kaum wanita atau awam,” kata Momoko Nishimura, seorang wanita awam tertahbis dari Jepun dan juga perwakilan pada pertemuan para Uskup, Oktober lalu.

Selain Momoko, Susan Pascoe dari Australia yang bertugas sebagai pakar dan fasilitator sinode, bersama-sama merasmikan program Sekolah Sinodaliti untuk Organisasi Wanita Katolik Dunia pada Februari 29 lalu. Program itu dijalankan dalam talian.

Menurut Momoko, pekerjaan sidang sinode pada Oktober dibangunkan berdasarkan “perbualan dalam Roh”, sebuah proses di mana setiap orang dalam kumpulan kecil – biasanya 10 atau 11 orang – berbicara mengenai sebuah topik selama empat minit tanpa interupsi.

Lalu ada jeda untuk berdoa.



Para perwakilan Sinode tahun lalu.

Kemudian setiap orang memiliki waktu tiga minit bagi menanggapi apa yang dibagikan orang lain pada pusingan pertama. Setelah jeda untuk berdoa, dimulakan perbincangan terbuka.

“Ini adalah cara berkongsi yang sangat sinodal,” kata Momoko kerana ia mendorong para peserta untuk mendengar dan berdoa sebelum tanggapan.

“Ini juga merupakan cara yang sangat efektif agar seluruh umat Tuhan dapat terlibat dalam pengambilan keputusan,” tambahnya.

Dalam persiapan untuk sidang sinode kedua, yang dijadualkan pada Oktober 2-27, keuskupan dan konferensi para uskup diminta mengadakan sesi dengar pendapat dan konsultasi lebih lanjut yang berfokus pada laporan sintesis dari sidang pertama serta pertanyaan:

“Bagaimana kita dapat menjadi Gereja sinode yang menjalankan misi?”

Konferensi-konferensi para uskup diminta mengirinkan ringkasan perbincangan ke sekretariat sinode Vatikan pada Mei 15.

Susan mengatakan laporan sintesis tersebut menegaskan bahawa perempuan dan lelaki dan wanita dalam Gereja “mempunyai martabat baptisan yang sama”.

Wanita merupakan majoriti orang yang duduk di bangku Gereja dan mereka biasanya adalah orang pertama yang menyebarkan iman kepada generasi baru.

Beliau mengajak umat agar berhenti membicarakan wanita sebagai sebuah masalah dan sebaliknya mendorong budaya di mana wanita dan kaum lelaki berdialog bersama.” — *media Vatikan*

## Paderi baharu sertai forum tentang perdamaian

ROMA: Forum selama seminggu mengenai keinsafan atau penintensi serta pengampunan memberi peluang kepada para paderi baharu ditahbis dan seminarian yang bakal ditahbis, merenung lebih dalam tentang Sakramen Pengakuan.

Dianjurkan oleh *Apostolic Penitentiary Vatican*, forum itu dikendalikan oleh para pakar dari pelbagai disiplin yang menjelaskan topik-topik seperti indulgensi sehinggalah hubungan antara pengakuan dan kecerdasan buatan.

Forum itu dibuka pada petang Mac 8 oleh Kardinal Mauro Piacenza, ketua Penitensiarium Apostolik.

*Prelatus itu* memulakan ucapannya dengan merenungkan Tahun Jubli 2025 yang akan datang, bahawa, walaupun ia sering tidak disedari tetapi aspek perdamaian

adalah penting kepada acara itu.

Sebelum “cahaya” pengampunan boleh bersinar di dunia, ia harus terlebih dahulu bersinar dalam diri kita masing-masing.

“Sesungguhnya pembaharuan Gereja dan dunia harus dimulakan dengan pembaharuan peribadi kita sendiri dan langkah pertama ialah pengampunan serta keinsafan.”

Kardinal Mauro juga menunjukkan pentingnya pertaubatan dalam pembaharuan Gereja. “Pembaharuan memang perlu sepanjang masa. Tetapi bukan membentuk semula Gereja mengikut kemahuan kita sebaliknya lebih kepada membenarkan pembinaan kemanusiaan ita dalam belas kasihan Tuhan.”

“Sakramen Pengakuan mendamaikan kita dengan “seluruh badan Gereja,” kata Kardinal Mauro. — *media Vatikan*



## Akses bantuan terhalang, dijangka bayi mati kebuluran akan meletus



JALUR GAZA: Agensi bantuan kemanusiaan UNICEF “membunyikan amaran” mengenai tragedi yang berlaku di Gaza.

“Kami amat bimbang dengan kematian kanak-kanak di sini kerana kekurangan zat makanan,” kata Adele Khodr, Pengarah Serantau untuk Timur Tengah dan Afrika Utara, bercakap kepada media antarabangsa pada Mac 10.

“Sekurang-kurangnya sepuluh kanak-kanak dilaporkan meninggal dunia akibat dehidrasi dan kekurangan zat makanan di Hospital Kamal Adwan di Semenanjung Gaza Utara sejak beberapa hari lalu.

“Kemungkinan terdapat lebih ramai kanak-kanak bertarung nyawa di suatu tempat, di beberapa hos-

pital di Gaza dan mungkin lebih ramai kanak-kanak di utara tidak mendapat penjagaan sama sekali.”

Dalam kenyataan UNICEF, Adele Khodr berkata kekurangan makanan berkhasiat, air bersih dan perkhidmatan perubatan adalah kerana mendapat halangan dan terdapat pelbagai bahawa bagi operasi kemanusiaan PBB bagi menghantar bantuan.

Ini menjejaskan kanak-kanak dan ibu yang menyusukan bayi mereka, khususnya di Semenanjung Utara Gaza.

UNICEF, bersama-sama dengan agensi bantuan kecemasan antarabangsa yang lain, telah merayu akses percuma bagi menyelesaikan krisis kemanusiaan, mencegah kebuluran sekaligus menyelamatkan

nyawa kanak-kanak.

Mereka telah memperbaharui permohonan mereka untuk beberapa pintu masuk yang boleh dipercayai untuk membawa bantuan dari semua kemungkinan lintasan, termasuk ke utara Gaza. Mereka juga meminta pihak berkuasa Israel “untuk jaminan keselamatan dan laluan tanpa halangan untuk mengagihkan bantuan secara berskala, ke seluruh Gaza, tanpa penangguhan dan halangan akses.”

Sejak Oktober, tahun lalu, UNICEF telah “membunyikan penggera” mengenai jumlah kematian di Gaza dan risiko peningkatan kematian jika krisis kemanusiaan akan berlaku jika krisis pemakanan semakin tidak ditangani. — *media Vatikan*

AUDIENSI UMUM BERSAMA SRI PAUS FRANSISKUS

PENULIS JEMPUTAN BERKICAU

# Jauhkan hati kita dari dosa keangkuhan

VATIKAN: “Marilah kita memanfaatkan masa Pra-Paskah ini untuk melawan keangkuhan kita,” kata Sri Paus Fransiskus semasa Audiensi Umum minggunya pada pagi Rabu, Mac 6 di Vatikan.

Bapa Suci meminta Fr Pierluigi Giroli dari Sekretariat Negara Vatikan, untuk membaca katekesisnya kerana mengalami “sedikit selsema.”

Menjelang musim di Roma, audiensi tidak dilakukan di Dataran Sto Petrus akibat cuaca sejuk dan berpindah ke Dewan Paul VI.

## Kejahatan keangkuhan

Meneruskan siri katekesisnya tentang kejahatan kebajikan, prelatus itu menjelaskan kejahatan keangkuhan.

Keangkuhan dapat diterjemahkan sebagai “kemegahan dan kesombongan yang berlebihan,” dan dapat dilihat melalui “sifat mementingkan diri, bongkak dan takbur”. Sri Paus memberi peringatan bahawa Yesus turut menegur tentang “keangkuhan hati manusia”

“Keangkuhan” kata Sri Paus Fransiskus, “Adalah penyakit hati manusia. Ia penyakit kebudak-budakan tetapi malapetaka yang dibawanya boleh membinasakan.”

“Dari semua kejahatan, keangkuhan adalah ‘ratu agung’. Dalam puisi terkenal ‘Divine Comedy’ oleh Dante, beliau meletakkan keangkuhan di peringkat pertama api penyucian.

Keangkuhan menyebabkan manusia jauh daripada Tuhan dan bagi memulihkan kejahatan ini, memerlukan masa dan usaha, ia memerlukan perjuangan gigih bagi umat Kristian untuk memerangi sikap angkuh dan bongkak ini,” ujar Sri Paus.



Sri Paus Fransiskus membuat tanda Salib bersama kanak-kanak selepas audiensi pada Dis 29, 2021 di Vatikan. Gambar: Media Vatikan.

“Di dalam kejahatan keangkuhan ini, terselit dosa radikal di mana ada dorongan atau kemahuan tidak masuk akal untuk menjadi seperti Tuhan.

“Dosa Adam dan Hawa, yang diceritakan dalam kitab Kejadian, adalah contoh manusia yang ingin menjadi seperti Tuhan. Inilah dosa keangkuhan kerana iblis menggoda dan memberitahu mereka, “Apabila kamu memakannya mata kamu akan terbuka, dan kamu akan menjadi seperti Tuhan” (Kej. 3:5).

Sri Paus mengatakan orang yang bongkak mudah dikenali. “Anda akan menyedari anda berhadapan dengan orang bongkak semasa memberikannya kritikan

membina tetapi orang itu bertindak balas dengan cara yang berlebihan, seolah-olah kita telah menyinggung perasaan ‘Yang Mulia!’”

Bapa Suci menasihati untuk berhadapan dengan orang yang bongkak, perlu kesabaran, tidak perlu terlalu banyak bercakap apatah lagi membetulkan mereka.

Antidot bagi keangkuhan ialah kerendahan hati. Tuhan mencintai orang-orang yang rendah hati tetapi mengecam orang yang sombong.

Sri Paus mengakhiri audiensinya dengan menyeru umat Kristian menghakis keangkuhan dalam hati mereka sepanjang Pra-Paskah ini. — *media Vatikan*

## Lima petanda anda perlu mengaku dosa!

Setiap penyakit dikesan oleh simptom, Apabila jiwa kita sakit ia juga menunjukkan beberapa tanda. Berikut adalah sebahagian petanda yang cuba memberitahu anda untuk melakukan Sakramen Pengakuan:

### ● Mudah Marah

Apabila kita melakukan pengakuan, kita lebih mudah untuk bertolak ansur dengan tingkah laku negatif orang lain Tetapi, apabila hari dan minggu berlalu sejak pengakuan terakhir kita, kesabaran kita semakin terhakis dan sukar untuk memahami orang lain. Kita mudah berasa marah dan senang tersinggung dengan provokasi kecil.

### ● Tidak ada semangat melawan percubaan

Walau apa pun bentuknya, godaan sentiasa hadir. Ia mengelilingi kita dan menunggu kita lalai lalu menyerang kita dan menjatuhkan kita.

Apabila itu berlaku, hati nurani kita akan memberi amaran bahawa kita perlu kembali ke tempat yang selamat! Tidak ada yang lebih baik selain Sakramen Pengakuan untuk menguatkan kita.

### ● Tidak mahu berdoa atau ke Misa

Kemalasan rohani yang tidak dapat dijelaskan mula menyerang kita. Ia menyebabkan kita tidak mahu berdoa dan tiba-tiba muncul dalam fikiran kita ba-

hawa menghadiri Misa kelihatan membebankan atau merasa minggu ini tidak perlu menghadiri Misa.

Kita membuat alasan untuk tidak pergi Misa tetapi kemudiannya berasa kesal. Ini adalah petanda, iblis telah menjerat kita dan kita perlu mengaku dosa.

### ● Fikiran pesimis

Apabila kehidupan rohani kita merosot, sukar bagi kita untuk optimis. Kita akan lebih cenderung untuk menjadi pesimis dan berfikir buruk tentang orang lain, kerana tiada apa yang kelihatan baik kepada kita dan kita mencari kesalahan dalam semua orang dan segala-galanya.

### ● Berasa sedih

Kita akan mula berasa sedih tanpa mengetahui sebabnya. Kita mungkin mula berfikir bahawa semua orang tidak menyukai kita, menentang kita atau berfikir mereka tidak menghargai apa yang kita lakukan.

Mungkin juga kita akan fikir, lebih baik berjauhan daripada keluarga, rakan atau rakan sekerja. Kita mula tidak berpuas hati dengan penampilan kita, dan keyakinan diri kita juga menurun. Kita secara beransur-ansur lupa bahawa kita adalah anak-anak Tuhan, yang dicipta menurut rupa-Nya dan kita mempunyai martabat yang tidak ternilai. — *Aleteia*

## Ideologi gender

Dalam dunia yang semakin terpolarisasi oleh ideologi dan kepercayaan yang berbeza, Sri Paus Fransiskus sekali lagi menjadi tajuk utama kerana lantang bersuara dalam hal isu-isu kontemporari.

Kali ini, tumpuannya berfokus terhadap apa yang disifatkannya sebagai “penjajahan ideologi” yang berbahaya khususnya budaya yang dipanggil budaya gender dan konsep hak pengguguran.

Kenyataan tegas itu menekankan pendirian Sri Paus dan menyerlahkan perdebatan yang lebih luas dalam masyarakat dan Gereja Katolik.

Bapa Suci Fransiskus yang terkenal dengan sifat spontannya, sesungguhnya sering mencekutkan perbincangan di dalam dan di luar komuniti Katolik, khususnya pada isu yang berlawanan dengan ajaran Gereja.

Kritikan Bapa Suci terhadap “penjajahan ideologi” merujuk kepada pengenalan ideologi tertentu ke atas budaya dan masyarakat, yang menurutnya, menghilangkan perbezaan dan memudahkan realiti manusia yang kompleks.

Sri Paus mengecam “ideologi hodoh zaman kita” iaitu budaya gender, yang dianggapnya sebagai percubaan untuk menghapuskan perbezaan antara gender dan mempromosi hak pengguguran yang dilabelkannya sebagai “hak pengguguran yang tidak masuk akal”.

Pada tahun 2015, semasa penerbangan pulang dari Filipina, Sri Paus Fransiskus turut membicarakan buku teks sekolah yang mempromosikan teori gender.

Bapa Suci membuat perbandingan yang jelas antara antara “penjajahan ideologi” masa kini dan taktik penindasan yang digunakan oleh “diktator abad yang lalu.”

Kesejajaran ini sudah menjadi tanda jelas tentang kebimbangannya terhadap penggunaan teori gender secara meluas dalam bahan pendidikan, menekankan potensi bahaya mengenakan ideologi sedemikian seraya mengingatkan rejim autoritarian masa lalu.

Inilah yang berlaku di seluruh dunia seperti Jepun di mana sebilangan kecil orang telah memperkenalkan ‘buku teks gender’ di sekolah rendah.

Komen daripada Sri Paus Fransiskus adalah selaras dengan ajaran Gereja Katolik mengenai gender dan kesucian hidup, menegaskan semula pendiriannya di tengah-tengah perdebatan global yang semakin meningkat mengenai isu ini.


Kritikan Sri Paus Fransiskus terhadap ideologi gender adalah sangat penting memandangkan beberapa tahun ini, ada pihak yang menafikan ideologi sedemikian wujud.

Kepausan Bapa Suci Fransiskus ditandai dengan kesediaan untuk terlibat dalam dialog dan menunjukkan belas kasihan terhadap individu, oleh itu jika dia memilih untuk “berdebat” atau menegur dalam kes-kes tertentu, bermakna ia mencerminkan kebimbangan akan kesan ideologi ini terhadap kesejahteraan masyarakat! — *Cristian Martini Grimaldi, ucanews.com*

● *Cristian berpengkalan di Tokyo, menulis tentang Jepun, Korea dan negara-negara Asia yang lain. Beliau juga bekerja untuk L'Osservatore Romano, akhbar harian negara Vatikan lebih sedekad lalu.*

### KENYATAAN MISI HERALD

HERALD adalah Minggu Katolik Gereja Malaysia. Ia berusaha untuk menyampaikan berita-berita terkini, nilai-nilai Kristian dan berusaha untuk berdialog dengan semua sektor masyarakat untuk membina komuniti beriman kepada Tuhan yang harmoni. Kami menyokong pembentukan Gereja dan menggalakkan umat awam dan religius untuk membuat keputusan moral di arena luar Gereja.



## Seminar kepimpinan pastoral di KSFX

KENINGAU: "Salah satu tanda pelayanan kita adalah panggilan Tuhan ialah kita mencintai tugas pelayanan kita, bersemangat untuk melaksanakannya dan mendapat kebijaksanaan dalam pelayanan itu," kata Msgr Gilbert Lasius semasa menyampaikan homili sempena Misa pembukaan Seminar Kepimpinan Pastoral.

Katedral St Francis Xavier menganjurkan seminar tersebut di Dataran Solidariti pada Februari 23-24 yang lalu.

Penganjuran seminar ini adalah bertepatan apatah lagi KSFX baharu sahaja membubarkan dan menubuhkan semula Majlis Pastoral Paroki di peringkat paroki dan zon-zon di bawah naungannya.

Seminar ini dimulakan dengan Ibadat Jalan Salib diikuti Misa Kudus pembukaan yang dipimpin oleh Msgr Gilbert Lasius.

Dalam sesi kedua, Sdra Patrick Marius, Pengerusi Tim Pastoral Keuskupan Keningau menyampaikan topik mengenai "Kepimpinan dan Pelayanan" yang menghurai-



Para peserta giat menyanyi dan memuliakan Tuhan dalam Seminar Kepimpinan Pastoral di Dataran Solidariti Keuskupan Keningau baru-baru ini.

kan maksud seorang pemimpin Katolik.

"Pemimpin seharusnya mempunyai kewibawaan dan keberanian untuk mempengaruhi orang lain agar bersatu dalam membangun kerajaan Tuhan," kata Sdra Patrick.

Fr Rudolf Joannes, paderi paroki Tambunan dalam sesi ketiga, "Garis Panduan MPP dan Peranannya" memberi pencerahan tentang MPP sebagai badan pelaksana

bukannya pembuat keputusan dan mereka harus bekerjasama dengan paderi paroki dalam pembangunan pastoral.

Tambahnya lagi, Pengerusi MPP harus membahagikan tugas pelayanan yang ada kepada ahli-ahli jawantankuasa yang telah dilantik dan bukannya bertindak sendiri.

"Spiritualiti Kepimpinan" yang disampaikan oleh Sdra Patrick menegaskan bahawa seorang pemimpin harus hidup dalam cin-

takasih Tuhan.

"Ini bermakna seorang pemimpin harus hidup dalam doa dan rajin membaca alkitab agar hidup mereka sentiasa diperbaharui oleh cintakasih Tuhan."

Sesi terakhir, "Teamwork dalam konteks Keuskupan Keningau" disampaikan oleh Msgr Gilbert Lasius yang memberitahu bahawa kepimpinan di Keuskupan Keningau didasari oleh semangat "berjalan bersama" selaras dengan wawasan Keuskupan Keningau, "Umat Tuhan yang berjalan bersama dalam Yesus Kristus".

Seminar diakhiri dengan perayaan Ekaristi yang dipimpin oleh Uskup Cornelius Piong.

Memetik Surat Rasul Petrus yang pertama, prelatu itu berpesan agar barisan pemimpin MPP yang baharu, dapat menjalankan tugas masing-masing dengan hati terbuka, memimpin bukan atas keuntungan peribadi tetapi atas pengabdian kepada Tuhan. — *Juanis bin Marcus*

MELAKA: Umat Gereja St Theresa berkumpul pada Februari 25 lalu untuk menyertai rekoleksi Pra-Paskah yang mengumpulkan kepada Tujuh Kalimah terakhir Yesus.

Diselenggarakan oleh paderi paroki, Fr Thomas Chong SJ, seramai 191 peserta menyertai latihan kontemplatif dan memantapkan iman mereka sempena Pra-Paskah.

Menurut Fr Thomas rekoleksi itu bukan sahaja tentang doa dan meditasi tetapi juga ziarah peribadi yang disertai dengan keheningan batin serta refleksi.

Para peserta diajak untuk mengenali kasih Kristus secara peribadi dan membenarkan kasih itu bertumbuh subur dalam diri mereka.

Di setiap stesen, para peserta digalakkan untuk merenung teks kitab suci yang disediakan, soalan refleksi dan membayangkan

## Tujuh kalimah terakhir Yesus



adekan penyaliban Yesus.

Pada setiap stesen, 20 minit diperuntukkan untuk merenung, bermeditasi, beraktiviti atau menonton klip video singkat.

Setiap tujuh perkataan yang diucapkan oleh Yesus di kayu salib direnung semula

dengan tema mendalam tentang pengam-punan, peringatan, pengabaian, dahaga, penyempurnaan dan penyerahan kepada kehendak ilahi.

● **Perkataan Pertama:** "Bapa, ampunilah mereka! Mereka tidak tahu apa

yang mereka lakukan."

● **Perkataan Kedua:** "Amen, Aku berkata kepadamu, hari ini kamu akan bersama-Ku di Firdaus."

● **Perkataan Ketiga:** "Ibu, inilah anakmu... Inilah ibumu."

● **Perkataan Keempat:** "Tuhanku, Tuhanku, mengapa Engkau meninggalkan Aku?"

● **Perkataan Kelima:** "Aku dahaga."

● **Perkataan Keenam:** "Sudah selesai."

● **Perkataan Ketujuh:** "Bapa, ke dalam tangan-Mu Ku serahkan roh-Ku."

Para peserta saling berkongsi pengalaman dan pertumbuhan rohani mereka setelah mengikuti rekoleksi itu.

Rekoleksi Pra-Paskah Tujuh Kalimah terakhir Yesus bukan sahaja memperdalamkan iman melalui kata-kata terakhir Yesus tetapi juga penguatan tentang kebangkitan dan kuasa pemberitaan Injil.

## Kanak-kanak sumber gembira dunia dan Gereja



LUNDU, Sarawak: Kem Kanak-kanak Sekolah Minggu dengan tema 'Hadiah Yang Sempurna' telah dianjurkan oleh para pembimbing Sekolah Minggu bersama kerassulan belia pada Februari 12-13 di Gereja St Felix, Kampung Biawak.

Kem tersebut disertai 40 kanak-kanak berumur 7-12 tahun, lapan orang guru pembimbing Sekolah Minggu dan 17 orang fasilitator yang terdiri daripada golongan belia.

Objektif kem itu adalah untuk membimbing kanak-kanak hidup berdikari, lebih mengenali diri, memupuk iman kanak-kanak serta menanam semangat saling menghormati

dan menyayangi alam ciptaan Tuhan.

Kem itu juga bertujuan untuk mencungkil bakat di kalangan kanak-kanak dan mengakrabkan lagi semangat persaudaraan melalui pelbagai aktiviti interaktif yang menarik.

Kanak-kanak dibimbing untuk mengenali dan menghargai diri sendiri, bahawa mereka adalah Bait Tuhan, pengetahuan tentang musim Pra-Paskah, acara unggun api, permainan, doa dan perkongsian.

Mereka juga merayakan abang dan kakak Tahun Enam yang akan beralih kepada tahap katekismus seterusnya. — *Today's Catholic*

## KED sebagai pusat penginjilan

PLENTONG, Johor: Di beberapa paroki, aktiviti KED yang dijalankan pada pasca Covid-19 mendapat sambutan suam-suam kuku. Tidak tunduk pada cabaran, KED Permas Jaya Gereja St Joseph menganjurkan sambutan Tahun Baru Cina pada Februari 24.

Acara itu yang dihadiri oleh 70 umat dari kumpulan berbahasa Inggeris, Cina dan bahasa Malaysia yang menggabungkan tradisi budaya dengan refleksi rohani.

Acara kemuncak pada hari itu ialah katekis yang disampaikan oleh ahli-ahli KED dalam tiga bahasa, selain berdoa, memuji dan menyanyikan lagu-lagu rohani.

Katekesis-ketekesis yang disampaikan menekankan kepentingan umat Katolik untuk mengekalkan tradisi budaya serta menampatkan Tuhan dalam semua perayaan dan acara.

Penceramah mengingatkan hadirin bahawa di sebalik populariti zodiak perayaan, dalam agama Katolik, manusia adalah makhluk hidup yang dicipta oleh Tuhan dan lebih unggul daripada haiwan.

Oleh itu, umat beriman diminta tidak terlalu mempercayai zodiak Cina sebaliknya digalakkan untuk memberi tumpuan kepada Tuhan, menyerahkan hidup kepada pemeliharaan ilahi-Nya.

Memetik petikan dari Injil Matius, salah seorang penceramah menekankan pentingnya menghidupkan lapan sabda bahagia yang diajarkan oleh Yesus iaitu kerendahan hati, berbelas kasihan, kebenaran dan kemurahan hati.

Acara diakhiri dengan seruan kepada ahli KED agar mengongsikan Khabar Gembira kepada orang lain khususnya yang masih belum mengenal Kristus.

